

REGIONAL NEWS

MPCC

Mizoram Pradesh Congress Committee (MPCC) Treasurer Dr Lalmalsawma Nghaka chuan sorkarin Mipui Ip atanga cheng nuai 2300 dawn kawng siamna tur chhiah a lak luih tawh hnuah, tui let hnuah Mizoram kawngpui chhiat ber hun Mizoramin a tawng mek chu vanduaithlak a tih thu a sawi.

Nimina Sihphir leh Lungdai inkar kawngpui chhia a tlawhnaah he thu hi sawiin Dr. Lalmalsawma Nghaka chuan, tun thal chhungin Sihphir leh Lungdai inkar kawngpui chhia chu siam thar vek ni mahsela, thla 3/thla 4 lek hnuah tlan ngaihna awm lo khawpin a chhe leh hmanani a ti a, kum 15 daih kawng an siam dawn tia mipui hmaa intiamtute sawrkarna hnuaiah Aizawl khawpui chhung kawng a ni emaw, khaw kar kawng, a khawi a mah fur khat daih an awm ta mang lo chu a vanduaithlak hle a ni a ti a. Sawrkar chu an mawhphurhna, a fawng vuantu an ni tih inhai tawh lovin, NHIDCL, BRO, leh Contractor te mawhpuh tum zel tawh lo se a duhawm hle a ni, a ti.

MPCC Treasurer chuan nikum September thla atangin sorkarin mipui ip atangin kawng siamna tur chhiah (cess),tih luihna in an la tih sawiin tunah hian kawng siam nan tuialhthei chhiah a lak tling khawm chu nuai 2300 dawn a ni tawh a ti a, kawngpui siamna atana lak tur ti siin vawiina Mizoram kawngpui dinhmun chu a chhe hle a ni a ti bawk.

<><><>

NH TRAFFIC

Kolasib district senior SP Pu David H Lalthangliana chuan August ni 2-a thupek a lo chhuah chu Zirtawpni khan a thiat a, Kawnpui leh Aizawl Durtlang inkara zan lama 407 truck tlan phalna chu a sut.

Kolasib district SP chuan August ni 2 khan August ni 4 atanga September ni 2 inkar chhung atan a 407 Truck leh a tlukpui lirthei tlan dan tur ruahmanin zan dar 10 leh zing dar 5 inkar chhung tlang kawng lama tlan a phalsak a. He tih lai hian NH 6 chu truck kal theiha siamthat tawh ni a sawi a nih avangin he thupek hi sutin Zirtawpni atang khan tlang kawnga kal khap a ni a, Sairang lamah vek kal tawh tur a nih thu a tarlang a, thupek zawm lova tlang kawng lama kal luite chu MV Act section 177 & 179 hmanga hrem theih an ni ang. He tih lai hian Aizawl district SP Pu Rex Zarzoliana Vanchhawng pawhin thupek tichhuakin Aizawl Durtlang leh Kawnpui inkarah 407 truck leh a tiatpui tlan khap a nih thu a puang bawk a, 407 truck leh a tlukpuite chu Sairang kawng (NH 06) lama tlan vek tawh tur a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.

<><><>

LMC

Tun hnai a Lunglei Convention Centre-a Lunglei Municipal Council (LMC) Board of Councillors (BoC) thukhawm chuan The Mizoram Urban Area Building Regulation 2024 chu Lunglei khawpui chhunga mipuite zawh tawka kalpui a nih theih dan tur lo duang tura ruat, Chief Executive Officer (CEO) Pu Donny Lalruatsanga'n ruahmanna a siam chu thlir ho a ni a. Rawtna hrang hrangte sawiho in, siam rem ngai laite CEO-in lo siam tha se, BoC meeting leh hunah thlir ho leh ni se,an ti.

LMC BoC hian kumin 2025-a Krismas Bazar siam tura BoC-in a lo rel tawh bawhzui dan tur leh hma lak dan tur rel a ni a. Hemi atan hian Task Force Committee din niin, anni hian ruahmanna lo siamin, BoC meeting leh hunah report pe se, tih a ni a. Kum 2023-2024 Urban Local Body Grant 2nd Installment dawn fel a nih thu tar lan niin, kalpui dan tur sawi ho a ni a. Ward tinah rualkhai taka hma lak dan tur ruahman ni se, tih a ni. LMC-in mipuite chhawk zangkhai nan Urban Transport hnuaia khawpui chhunga bus service-tir tura BoC hmasain a lo rel tawh bawhzui dan tur sawi ho a ni a. GIA hmanga hma lak dan ngaihtuahpui turin sawrkarah dilna thlen ni se, Budget-ah telh tura chhawp chhuah ni se,an ti a,bawhzui turin Executive Councillor Pu Zorinsanga Hmar ruat a ni.

Lunglei khawpui bawlhhlawh awm lohna a siam tura ruahmanna Garbage Free City Project kalpui mekah ward pali - Ward number 1, 2, 9 leh 11-ah te hma lak mek a ni a. He'ng hma lakna atan hian BoC chuan ULB Grant Tied Fund, Sanitation and Solid Waste Component atangin cheng nuai 40 an pawm. LMC Ward 4-na Councillor Pu R. Lalramzauva Resolution, ZMC&H pantute tana khualbuk sak chungchang pawh sawi ho a ni a. Dan lam atanga thlirin, LMC-in a tih theih thil a nih leh nih loh te zir chian a, sawrkar lamah thlen rel a ni.

LMC Board of Councillors thutkhawm, an chairman Chairman Pu Lalzuithanga kaihhruai-ah hian councillor thlan 11 an tel kim ani.

<><><>

COVID

Tun dinhmunah Mizoramah Covid-19 hri kai mi 11 enkawl lai mek a awm a, kuminah hri kai hmuhchhuah 39 an awm tawh.

Integrated Disease Surveillance Programme (IDSP) hotute hnen atanga thu dawn danin Zirtawpni khan Covid hri kai inringhlel mi 27 endik zingah 1 chuan Covid hri a kai tih hmuhchhuah a ni a. Hemi hma Thawhlelni khan Covid-19 hri kai inringhlel mi 10 sample endik te chuan hri an kai vek tih hmuhchhuah a ni a. Hri kai hmuhchhuah hi Aizawl district ami niin Zoram Medical College & Hospital leh LRM hospital a hmuhchhuah a ni a. Hri kai tih a langchhuak lova, ngaihtuahawm a nih loh thu doctor-te'n an sawi.